

Date – 20/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chief Minister Pu Lalduhomaan industry tenau te tichak tura hmalakna Raising and Accelerating MSME Performance (RAMP) nimin khan a hawng.**
- 2. School Education Minister Dr Vanlalthlanan school 340 dinhmun chawikan tura thutlukna a siam chu thiatin enthat leh an tum a ti.**
- 3. Sawrkar laipui chuan fur thlai Kharif Crop chi 14 ah Minimum Support Price a tisang.**
- 4. Muslim sakhaw hmunpui Mecca-a sahaw biakzina Hajj pilgrimage hun hmang mek mi 550 chu khawlum lutuk avangin an thi**

<><><>

RAMP

Chief Minister Pu Lalduhomaan industry tenau te tichak tura hmalakna Raising and Accelerating MSME Performance (RAMP) nimin khan a hawng a, Facilitation Cell a hawng bawk.

Aizawl Vanapa Hall-a a hawnaah thusawiin Chief Minister chuan, covid19 hripui vang khan Industry ten harsatna an tawk nasa a, heng ndustry te hian chak zawka hma an lo sawn leh theih nan Central sawrkar chuan RAMP a duang a ni. State te chu mahni mamawh ang zawnga guidelines duan a phalsak angin a hming pawh hi MSME Elevate Mizoram (MEMiz) tiin vuah a ni a ti.

Industry neihsa leh ding chho zel tur ten tangkai taka an chhawr turin Facilitation Cell din a ni bawk tih sawiin India ram economy za zela 30 vel hi small scale Industry te thawhchhuah a ni a, hna thawktu zaa 46 vel te hi small scale a thawk te an ni bawk a. Chuvang chuan anni pawhin Hand Holding Policy leh heng central scheme te hi kaikawpin nasa takin hma an la dawn a ti.

RAMP bakah hian MEMiz website leh MSME Facilitation Cell te Chief Minister hian a hawng a ni.

Commerce & Industry Minister Pu F. Rodinglana, pawhin thusawiin, ngaihtuahna thar pua Mizote hian thil an tih a ngai a. Kamding nih aiin Mahni kea ding nih rilruk ngam a tul tawh a, midangte thuhnuaia awm lova mahni thu anga hnathawhna, pension awm ve lo, tu leh fate thlenga chhawm theih eizawna a ni a ti. Entrepreneurship chu uar takin an kalpui dawn a, a tul

angin Dan te pawh an ennawn ang a, Industry te mamawh power siam chhuah thlengin an bei zel dawn a ni, a ti.

Tunah hian MSME sumdawnna unit 34900 vel Mizoramah an awm mek a, a zatve aia tam te hian Udyam registration an la nei lo a ni.

<><><>

YOGA

Kumin Internation Day of Yoga(IDY) zirtawpni a hman tura tih chu inbuatsaihna kalpui mek zel a ni a.

IDY 2024 inpuahchana chungchangah hian Akashvani Corr in Ayush Dy Director Dr S. Mara Thansiami a kawmnaah Yoga chu fitness atana pawimawh tak a nih thu leh taksa hriselna ngaih pawimawh a ngai a ni tih a sawi a. Naupang atanga puitling, raipur thlengin yoga exercise a awm thu a sawi a ni.

Hun bi nei taka taksa sawizawi chu rilru hriselna atan a pawimawh a, ruihhlo laka fihlim tur chuan taksa uluk a that thu a sawi a. Hriselna ngaih pawimawh a that thu leh kan nun danin a kentel natna tamtak do tur atan Yoga chu a tha a ni , a ti a. Drugs keng tel lo damdawi anih thu leh Yoga hmanga enkawl dam theih a awm a. Yoga that bikna chu breathing technique a tel thu leh mihring taksa hriselna a pui nasa em em a. Hlau mai lovin kan rilru leh taksa hriselna atan Yoga ngai pawimawh a tul thu a sawi bawk a ni.

Tun dinhmunah Ayush hnuaiah hian Instructor 12 an awm mek a, heng Instructor te hi District Hospital, Integrated Ayush Hospital, Thenzawlah te rawn theihin an awm mek a. Yoga Instructor awmlohna hmunah pawh Ayush Doctor te Yoga exercise chungchangah rawn theihin an awm mek a. Administrative Training Institute leh Ayush Dept tangkawpin trainees chi hrang hrangte hnenah Instructor pakhat kaihhruaina in ‘Yoga Exercise’ kalpui mek a ni bawk .

Kumin International Day of Yoga (IDY) hi khawvel hmun dangte rualin zirtawpni hian Mizoramah hman a ni anga, a lawmna pui ber Hawla Indoor Stadium, Republic Vengthlangah hman tum a ni.

<><><>

EDUCATION MINISTER

School Education Minister Dr Vanlalhlalan nikum Sept ni 27-a Council of Ministers thukhawmin school 340 dinhmun chawikan tura thutlukna a siam chu thiatin enthat leh an tum a ti.

He thu hi nimina a office chamber-a chanchinbu mite a kawmnaah sawiin Pu Vanlalhlana chuan school upgradation hi kalpui an tum tak tak takah Mizoram sorkar dan zam te an enchiang a, amaherawhchu heng dan te hi sorkar hmasa Council of Ministers meeting in hman theih loh khawpin a siam a, dan an siam chu a inkalh tlat avangin, school 340 dinhmun hlankai tur zinga tehnaa tling chauh hlangkai turin ngaihtuah that leh tura chhawp chhuah a ngai a ni a ti a, sorkar hmasa chuan inthlan dawna tlin duh luat avanga he thil hi a ti ni ngeia ngaih a ni a ti bawk.

Pu Vanlalhlana chuan sikul dinhmun chawikan tur zingah a phu tak tak te chu chawikan tura kalpui chhonzawm sak an nih dawn laiin, danin a phut anga building pawh neilo, result nei chhe lutuk te leh skul naupang nei tlem lutuk skul te thlauhthlak a ngai dawn a ti a, hengte hi tang leh zual sauh sauh tura an duh thu a sawi a ni.

Sikul dinhmun chawikan tur te hi siamfel a ni lo a, dinhmun hlankai tur sikul zingah pawh ngaihnathiamna engchinng kalpui tur tih pawh ngaihtuah leh tur a ni a ti a, sikul 340 hlankai tur zingah hian an tlin vek dawn loh avangin zirtirtu, chhungkua leh khawtlang hrilhhai an awm pawh a rinawm a, amaherawhchu heng sikul te hian tan an lak lehzual a ngai dawn a ni a ti.

School Education Minister chuan, sikul zingah result nei thalo te chu insawifiah turin an hriattir tih sawiin heng zingah hian an hriat chinah pawh harsatna ril tak nei te, zirtirtu awmlah avang te leh thildang tam tak a nih thu a sawi a, heng sikul te hi an mamawh dan a zirin an puiah dawn thu a sawi bawka, zirtirtu indaihlohna sukiang tur hian hma an la ngei ngei dawn a, sawnkual ngai pawh sawnkual ngei ngei an ni dawn a ni a ti.

<><><>

LADC

Lai Autonomous District Council a Congress leh MNF thawhdunna chu rinawm takin MNF party chuan a kalpui dawn tih MNF Gen Hqrs a Senior Vice President Dr.R.Lalthangliana'n a sawi.

He thu hi nimina Lawngtlai Press Club a chanchinbu mite a kawmnaah Sawiin Dr.R.Lalthangliana chuan LADC ah Village Council inthlanpui neihtur leh Lawngtlai Chandmary MDC by election neihtur ah mipuiten ngaihtuahna tak tak an sen tul a tih thu a sawi a. VC inthlan bikah chuan Political Party ang zawnga na taka kal chu khawtlang tan a thaberlo thei tih sawiin, State a rorellai apiang bawh ngawt hi khawtlang tan thil thaber a nihloh theih vangin mipui ten mitha thlangchhuak tura ngaihtuahna fim an hman tul a tih thu a sawi.

Lawngtlai Chandmary MDC by election neihtur ah MNF leh Congress chuan thawhdunna thuthlung siamin MNF Candidate chu Candidate intawm atan pawmin lungrual takin ke an pen tih a sawi a, LADC ah Congress leh MNF thawhdunna chu Chandmary bial MDC by election chuan a sawi danglam dawnlo tih sawiin, an khingpui ten MNF thlantlin a nih chuan LADC Sorkar ah an thawhpui Congress MDC thlauhthlaa MNF hlang Sorkar piang maitur anga sawi chu MNF rilru puthmang a nilo tih sawiin, MNF Party chuan Congress nen an thawhdunna chu zahtakin vawngim turin theihtawp a chhuahzel dawn a ni a ti.

Dr.R.Lalthangliana hi Dampa bialtu MLA Pu Lalrintluanga Sailo leh Dy.Speaker hlui Pu H.Biakzaua bakah Pu K.Riachho leh MNF Dist. Hqrs Lawngtlai hruaituten an tawiawm a ni.

<><><>

ASF

Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 343 thiin vawk 436 suat a ni a.

ASF vang hian Mizoramah kumin January thla atanga nimin thleng khan vawk 2700 thi nia record a ni a, vawk suat tawh zawng zawng hi 5397 a ni tawh a. Nimin bika vawk thi zat hi Aizawl District ah vawk 372 a ni a, Serchhip District ah 10 leh Kolasib ah 3 a ni a. Tihian Mizoram chhunga vawk thi zat hi 343 a ni a.

Nimin vek khan Mizoram chhungah vawk suat zat chu 436 a ni a. Aizawl District ah vawk 576 suat a ni a, Mamit District ah vawk 146, Serchhip District ah vawk 72 leh Kolasib ah vawk 14 suat a ni bawk a ni.

<><><>

UNION CABINET

Sawrkar laipui chuan fur thlai Kharif Crop chi 14 ah Minimum Support Price a tisang. Union I&B Minister Ashwini Vaishnaw sawidanin nimina Union Cabinet thukhawm chuan MSP tihsan hi a rel a. Hei bakah hian Maharastra-a Vadhavan Port tih changtlunte, Gujarat leh Tamil Nadu-a off-shore wind terminal hmasa ber siamte a remti a. Varanasi airport leh National Forensic Infrastructure tih chantlunte a remti bawk a ni.

<><><>

HAJJ PILGRIMAGE

Muslim sakhaw hmunpui Mecca-a sahaw biakzina Hajj pilgrimage hun hmang mek mi 550 chu khawlum lutuk avangin an thi.Thudawn danin Saudi Arabia-ah hian khua a lum hle a, celsius degree 50 chunglamah te a awm nia thudawn a ni.

Mitthi zingah hian Egypt mi tam berin mi 320 an ni a, hei bakah hian Jordan chuan an ram mi leh sa mi 60 an thih thu an sawi.

He hunpuiah hian pawn lama rei tak tak tawngtaina hunte hman a ni a. Hei vang hian mi tamtakin khawlum avang hian buaina an tawh phah nia hriat a ni.

<><><>